

AMARUBA GA YÛDA

Omusingo

¹ Yûda, mwambali wa Yezu Kristu, mwene wâbo Yakôbo, oku nshâgi ntonyi muli Nyamuzinda Îshe zalangagwa erhi Yezu orhuma.

² Obwonjo n'obuholo, n'obuzigire bigandâze muli mwe!

Ecirhumire ayandika aga maruba

³ Bîra bâni, ene mbà ndwîrhe nalonza okummuyandikira nti mmubwîre ebinwa by'obucire bwîrhu rhweshi, lêro nanacibona nkola ngwâsirwe okummuyandikira nti mmuhanûle lyo mulwîra obuyêmêre abatagatîfu bashobôlaga kwa lwoshi oku caligumiza.

⁴ Bulya hali abantu bammushesherîremwo bufunda-funda; balya batwîrîrwe olubanja kurhenga mîra: eyo mihera ekahindula engalo ya Nyamuzinda wîrhu eyijire masîma ga mubiri, ekâhakana Nnâhamwîrhu muguma yêne na Nyakasane Yezu Kristu.

Abîgîriza b'obunywesi n'obuhane bânahâbwe

⁵ Ciru akabà mwayigîrizîbwe ebyo byoshi caligumiza, nnonzize okummukengêza oku Nyakasane, erhi abà amalîkûza olubaga lwâge amanalurhenza omu cihugo c'e Mîsiri, enyuma ly'aho aherêrekeza ababulaga bwayêmêra.

⁶ Nabo bamalahika babulaga okukenga obukulu bwâbo, ci barhenga aha mwâbo,

abahizire omu nkoba z'omwizimya gw'ensiku n'amango, mpu balingiremwo olubanja lw'Olusiku lukulu.

⁷ Sodomo na Gomora n'ebishagala by'eburhambi kwo na kwo: nabo bagwîra okuhusha n'okushimba ebiremwa birhali bya bwôrhere buguma n'obwâbo, bahinduka lwîganyo lw'obuhane bw'omuliro gw'ensiku n'amango.

⁸ Abo bantu nabo kwo na kuguma: omu isirhe lyâbo, banakâsherêza emibiri yâbo, bagayaguze obukulu bwa Nyakasane, banalogorhere ebiremwa by'irenge.

⁹ Malahika mukulu Mikaheli erhi ajîsa shetani mbaka anamujîsa kadali oku mubiri gwa Mûsa, arhaderhaga mpu akamubwîra akanwa k'okumulogorhera, ci anaciderha, erhi: «Nyakasane akuhane!»

¹⁰ Ci bôhe banajâcire ebi barhamanyiri, n'ebi bayishi n'obwôrhere bwâbo bw'ecinya-mubiri kula ensimba zirhajira bukengêre zinayôrha, biri bya kubaherêrekeza.

¹¹ Bali bahanya! bulya bâshimbire enjira ya Kayini, bacîyôha omu kuhabuka kwa Balaamu erhi kulonz'iyunguka kurhuma, bâhungumukira omu bugoma bwa Korè.

¹² Abo bantu bo bakâzinza amadiniye ginyu g'ecinyabuguma. Nka balya, barhabà nshonyi, na ntà cindi bakengêra okurhali kuyunjuza amada gâbo. Kwo bali nka bitù birhalimwo nkuba bidwîrhe byayehûlwa n'empûsi; eri mirhi ya canda erhalikwo malehe, efîre kabiri enakundusire!

13 Eri mivumba mikali y'omu nyanja edwîrhe yarhengamwo omufula gw'enshonyi zâyo; ziri nyenyêzi zihabusire zidwîrhe zalingwa na nyan-dumà w'ensiku n'amango!

14 Kandi bo Henoki, shakulûza wa kali-nda kurhenga Adamu, alêbaga erhi aderha, erhi: «*Loli oku Nyakasane ayishire n'ebihumbi n'ebihumbi by'abatagatîfu bâge,*

15 *mpu atwîre abantu boshi olubanja, anayagîrize emihera yoshi oku bijiro bibi bakozi n'oku binwa by'ebijâci abo banya-byâha b'emihera bamuderhîre*».

16 Babà bantu bakâyôrha bacîduduma, ntà mango basîma, emunda iralà libahesire yo banajà, omu kanwa kâbo nderho za bucîbone zirhengamwo, banakalimîriza abantu mpu babarhôlekwo obunguke.

Ahanûla abemêzi

17 Ci mwêhe, bîra bâni, mukengêre ebinwa byalêbagwa n'entumwa za Nnawîrhu Yezu Kristu.

18 Ka barhammubwîraga oku omu nsiku nzinda hayish'ibà abantu basîma okugayaguza abâbo, abakashimba iralà ly'obubî bwâbo?

19 Bâbo bo bakammulerhamwo okucîberûlamwo, bantu bashimba obwôrhere bwâbo bw'ecinya-mubiri, Mûka Mutagatîfu arhababâmwo.

Irhegeko ly'obuzigire

20 Ci mwêhe, bazigirwa bâni, musimbane omu bûbake buyûbasirwe oku ciriba c'obuyêmêre bwinyu butagatîfu lwoshi, mushenge muli Mûka Mutagatîfu

²¹ munabêre omu buzigire bwa Nnâmahanga, muyôrhe mucîrheganyize okuyankirira olukogo lwa Nnawîrhu Yezu Kristu, omu buzîne bw'ensiku n'amango.

²² Abadwîrhe barhindira, mubarhabâle bayêmêre;

²³ abandi, mubacize, mubayôkole omu muliro; abandi bôhe mubafe bwonjo, ci erhi munayôbohire, mugaye ciru n'omwambalo guzinzîbwe n'omubiri gwâbo.

Irengi kuli Nyamuzinda emyâka n'emyâka

²⁴ Ayâgirwe Olya ogwêrhe obuhashe bw'okummulanga murhahirime n'okumuyîmanza embere z'irengi lyâge buzira izâbyo omu bushagaluke!

²⁵ Kuli oyo Nyamuzinda muguma yêne, Muciza wîrhu, oku bulagizi bwa Yezu Kristu Nnâhamwîrhu, irengi, obukuze, oburhegesi n'obuhashe, kurhenga embere igulu liremwe, na buno, n'emyâka n'emyâka! Amen.

BIBLIYA NTAGATIFU OMU MASHI
The Holy Bible in the Shi language of the Democratic
Republic of the Congo: Bibliya Ntagatifu omu mashi
(Bible with Deuterocanon)
La Sainte Bible en langue shi de la République
démocratique du Congo

copyright © 2024 BUKAVU Mashi and other Kivu Languages Bible

Language: Mashi (Shi)

Contributor: BUKAVU Mashi and other Kivu Languages Bible

Bibliya aha nfune ajage n'emurhima n'omu bijiro

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-02

PDF generated using Haiola and XeLaTeX on 1 Jul 2025 from source files dated 2 Jul 2025

32d7d8c6-4f1f-556c-bf3d-9ed771bbfd1e